



29. marts 2011

Inatsisartut suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppara:

Naalakkersuisunut apeqqut:

Aalisarnermut inatsisip allannguutissaannik suliaqarnermi, tusarniaanermut akissutit nalinginnaasut saniatigut, kattuffiit KNAPK aamma GA Naalakkersuisumit qanoq suleqatigineqarsimappat aamma paasitinneqartarsimappat.

(Inatsisartuni ilaasortaq, Karl Lyberth Siumut)

Tunngavilersuut:

Inatsisartuni ataatsimiinnerup aallartinnerani marlunngorneq 22. marts oqaluuserisassanut nassuiaammut atatillugu Aalisarnermut Piniarnermullu Naaalakkersuisoq erseqqissaateqarpoq aalisarnermut inatsisip allannguutissaannik suliaqarnermi aalisarnermut kattuffiit anginerit marluk qanimut suleqatigineqarsimasut paasitinneqartuuartarsimallutillu.

Naatsorsuutigilluinnarakku Aalisarnermut Piniarnermullu Naalakkersuisoq eqqortumik Inatsisartunut paasissanik saqqummiisoq matumuuna piumasaraara nassuiaatigeqqullugu KNAPK-mut GA-mullu suleqatigiinnerit paasissutisseeqatigiittarnerillu qanga qanorlu ingerlanneqarsimanersut.

Tusarniaanermut akissutit saniatigut allakkat aalisarnermut inatsisip allannguutissaannik suliaqarnermi pigineqartut tamaasa, ataatsimeeqatigiittoqartarsimappallu ataatsimiinnermi imaqarniliat ilanngullugit, paasissutissatut nassiunneqarnissaat piumasaraara.